

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 37/9

ք.Երևան

26 օգոստոսի 2022թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ նախագահի երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա անձանց ընդհանուր տնտեսական շահերից ելնելով համաձայնեցված գործելու հիմքով փոխկապակցված ճանաչելու մասին 22.07.2022թ.-ի N 504-3 որոշման դեմ Ա/Ձ Տաթևիկ Գրիգորյանի (ՀՎՀՀ՝ 37448602) դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ա/Ձ Տաթևիկ Գրիգորյանի (այսուհետ նաև՝ բողոքաբեր) դիմում-բողոքում մասնավորապես նշված է.

Բողոքաբերը հայտնում է, որ համաձայն չէ և ունի առարկություններ ՀՀ ՊԵԿ նախագահի կողմից կայացված 504-3 որոշման մեջ բերված փաստարկների հետ:

Ա/Ձ Տաթևիկ Գրիգորյանը պետական գրանցում է ստացել 27.05.2011թ.-ին և մինչև 29.09.2011թ.-ը զբաղվել է իրավաբանական խորհրդատվության գործունեությամբ և ոչ մի առնչություն չի ունեցել մրգի և բանջարեղենի առք ու վաճառքի հետ:

Որոշման մեջ նշված է, որ 01.08.2012թ. մինչև 10.08.2013թ. աշխատել է «Պարմա» ՍՊԸ-ում՝ որպես հսկիչ-վաճառողուհի: Այնուհետև աշխատանքի է անցել կրկին «Պարմա» ՍՊԸ-ում, կրկին որպես հսկիչ-վաճառողուհի 01.12.2015թ. մինչև 30.05.2016թ. և քանի որ գտվել է հղիության մեջ 30.05.2016թ.-ի դրությամբ անցել է դեկրետի:

08.2018թ.-ին մեկնել է Ընտանիքով Եվրոպա և միայն 2019թ.-ի վերջերին վերադարձել է Հայաստան: Իսկ մյուս ամսաթվերով «Անդակո» ՍՊԸ-ում իր աշխատելու փաստի վերաբերյալ գաղափար չունի: Բնականաբար իր և փոքր երեխայի կարիքները հոգալու նպատակով պետք է աշխատեր և բնականաբար դիմել է իրեն ծանոթ գործատուներին առաջարկելով միրգ-բանջարեղենի մատակարարում, որի գործունեությունը սկսել է Ա/Ձ գրանցվելով՝ 14.09.2020թ.-ին, և մինչև այսօր 29.07.2022թ. իր նույն Ա/Ձ-ով զբաղվել է միրգ-բանջարեղենի մատակարարմամբ «Անդակո» ՍՊԸ-ին պատկանող չորս՝ Վաղարշյան 10, Վաղարշյան 19, Խորենացի 9 և Ահարոնյան 1/6 հասցեներում գտնվող խանութներին, իսկ սկսած 04.2022թ.-ից միայն երկու՝ Վաղարշյան 10 և Ահարոնյան 1/6 խանութներին:

Ուստի համաձայն չէ թիվ 504-3 որոշման մեջ բերված փաստարկների հետ, երբևիցե ոչ մի առնչություն չի ունեցել որոշման մեջ նշված անձանց կամ Ա/Ձ-ների հետ:

Ելնելով վերոգրյալից՝ բողոքաբերը խնդրում է վերանայել որոշումը և իրեն հանել նշված անձանց ցուցակից:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ նախագահի կողմից 22.07.2022թ.-ին կայացվել է երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա անձանց ընդհանուր տնտեսական շահերից ելնելով համաձայնեցված գործելու հիմքով փոխկապակցված ճանաչելու մասին N 504-3 որոշումը (այսուհետ նաև՝ Որոշում):

Այսպես, ՀՀ ՊԵԿ հետաքննության և օպերատիվ-հետախուզության վարչության ոլորտային թիվ 3 բաժնի աշխատակիցների կողմից «ԱՆԴԱԿՈ» ՍՊ ընկերության (ՀՎՀՀ 00029448) նկատմամբ ձեռնարկված օպերատիվ-հետախուզական միջոցառումների արդյունքում ձեռք են բերվել փաստական տվյալներ և հանգամանքներ առ այն, որ ընկերությանը միրգ և բանջարեղեն մատակարարող անհատ ձեռնարկատերերը գործում են փոխկապակցված և ընդհանուր տնտեսական շահերից ելնելով համաձայնեցված: Մասնավորապես.

- Կարեն Մուրադյան Ա/Ձ-ն (ՀՎՀՀ 23190155) պետական գրանցում է ստացել 27.02.2013թ.-ին, 16.12.2013-05.02.2014թթ., 19.05.2017-22.03.2018թթ., 04.12.2018-02.06.2020թթ. ժամանակաշրջաններում հանվել է հաշվառումից: Անհատ ձեռնարկատերը գործունեությունը վերսկսել է 02.06.2020թ.-ից և հանդիսանում է շրջանառության հարկ վճարող: Կարեն Մուրադյան Ա/Ձ-ն զբաղվում է մրգերի և բանջարեղենի առևտրով և նրա կողմից 01.01.2021թ.-ից մինչև 30.06.2022թ. ընկած ժամանակահատվածում 154.619.489 դրամ ընդհանուր արժեքով ապրանքներ մատակարարվել են բացառապես «ԱՆԴԱԿՈ» ՍՊ ընկերությանը, որի կողմից դրանք հետագայում իրացվել են:

- Հռիփսիմե Հովհաննիսյան Ա/Ձ-ն (ՀՎՀՀ 23240638) պետական գրանցում է ստացել 07.03.2019թ.-ին, գործունեությունն իրականացնում է հարկման հատուկ համակարգում (շրջանառության հարկ): Հռիփսիմե Հովհաննիսյան Ա/Ձ-ն զբաղվում է մրգերի և բանջարեղենի առևտրով և նրա կողմից 01.01.2021թ.-ից մինչև 30.06.2022թ. ընկած ժամանակահատվածում մատակարարված ապրանքների ընդհանուր արժեքը կազմել է 117.419.183 դրամ, որից 114.555.284 դրամի ապրանքները, որոնք կազմում են մատակարարված ապրանքների 97 տոկոսը, մատակարարվել են «ԱՆԴԱԿՈ» ՍՊ ընկերությանը, որի կողմից դրանք հետագայում իրացվել են: Հռիփսիմե Հովհաննիսյանը 01.08.2013-30.09.2013թթ., 01.07.2014-31.12.2014թթ., 01.02.2015-28.02.2015թթ. ժամանակաշրջաններում աշխատել է Կարեն Մուրադյան Ա/Ձ-ի մոտ որպես մենեջեր, իսկ 01.11.2019թ.-ից մինչև 29.02.2020թ.-ը՝ «ԱՆԴԱԿՈ» ՍՊ ընկերությունում որպես վաճառատնի բաժնի պատասխանատու:

- Արշակ Մնացականյան Ա/Ձ-ն (ՀՎՀՀ 27970514) պետական գրանցում է ստացել 18.10.2018թ.-ին, գործունեությունն իրականացնում է հարկման հատուկ համակարգում (շրջանառության հարկ): Արշակ Մնացականյան Ա/Ձ-ն զբաղվում է մրգերի և բանջարեղենի առևտրով և նրա կողմից 01.01.2021թ.-ից մինչև 30.06.2022թ. ընկած ժամանակահատվածում մատակարարված ապրանքների ընդհանուր արժեքը կազմել է 134.578.588 դրամ, որից 128.971.185 դրամի ապրանքները, որոնք կազմում են մատակարարված ապրանքների 96 տոկոսը, մատակարարվել են «ԱՆԴԱԿՈ» ՍՊ ընկերությանը, որի կողմից դրանք հետագայում իրացվել են: Ձեռնարկված օպերատիվ-հետախուզական միջոցառումների արդյունքում պարզվել է, որ Արշակ Մնացականյան Ա/Ձ-ին դուրս գրված հաշվարկային փաստաթղթերում որպես ապրանքների մատակարարման վայր նշվում է ք.Երևան, Հյուսիսային պողոտա 3/85 հասցեն, որտեղ գործունեությունն իրականացնում է «ԱՆԴԱԿՈ» ՍՊ ընկերությունը, որը հանդիսանում է այդ ապրանքների իրական գնորդը:

- Տաթևիկ Գրիգորյան Ա/Ձ-ն (ՀՎՀՀ 37448602) պետական գրանցում է ստացել 27.05.2011թ-ին, 29.09.2011թ-ից հանվել է հաշվառումից և 14.09.2020թ-ին կրկին հաշվառվել: Անհատ ձեռնարկատերը հանդիսանում է շրջանառության հարկ վճարող: Տաթևիկ Գրիգորյան Ա/Ձ-ն զբաղվում է մրգերի և բանջարեղենի առևտրով և նրա կողմից 01.01.2021թ-ից մինչև 30.06.2022թ. ընկած ժամանակահատվածում մատակարարված ապրանքների ընդհանուր արժեքը կազմել է 153.786.887 դրամ, որից 152.574.520 դրամի ապրանքները, որոնք կազմում են մատակարարված ապրանքների 99 տոկոսը, մատակարարվել են «ԱՆԴԱԿՈ» ՍՊ ընկերությանը, որի կողմից դրանք հետագայում իրացվել են: Տաթևիկ Գրիգորյանը որպես հսկիչ 01.08.2012թ-ից մինչև 10.08.2013թ.-ին աշխատել է «ԱՆԴԱԿՈ» ՍՊ ընկերությունում, իսկ 10.08.2013-12.11.2013թթ., 08.01.2014-30.05.2015թթ., 08.01.2016-31.10.2019թթ. ժամանակաշրջաններում՝ «ԱՆԴԱԿՈ» ՍՊ ընկերության սեփականատիրոջ որդուն պատկանող «ՊԱՐՄԱ» ՍՊ ընկերությունում (ՀՎՀՀ 00257828): «ՊԱՐՄԱ» ՍՊ ընկերության գործունեությունը 14.09.2020թ-ից ժամանակավոր դադարեցված է:

Այսպիսով, ձեռնարկված օպերատիվ-հետախուզական միջոցառումների արդյունքում պարզվել է, որ «ԱՆԴԱԿՈ» ՍՊ ընկերությունը, անհատ ձեռնարկատերեր Կարեն Մուրադյանը, Հռիփսիմե Հովհաննիսյանը, Արշակ Մնացականյանը և Տաթևիկ Գրիգորյանը, ըստ էության, հանդիսանում են անձանց խումբ: «ԱՆԴԱԿՈ» ՍՊ ընկերությունը իրացրել է խմբի մեկ այլ անդամների՝ անհատ ձեռնարկատերեր Կարեն Մուրադյանի, Հռիփսիմե Հովհաննիսյանի, Արշակ Մնացականյանի և Տաթևիկ Գրիգորյանի կողմից նախորդող մեկ հարկային տարվա որևէ վեցամսյա ժամանակահատվածի ընթացքում արտադրած, ներմուծած կամ ձեռք բերած ապրանքների 60 և ավելի տոկոսը՝ արտահայտված քանակական կամ արժեքային մեծությամբ:

ՀՀ հարկային օրենսգրքի 30-րդ հոդվածի 2-րդ մասի համաձայն կազմակերպությունները և (կամ) ֆիզիկական անձինք համարվում են փոխկապակցված, եթե Օրենսգրքի 70-րդ գլխով սահմանված երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա կազմակերպությունները և (կամ) ֆիզիկական անձինք, ընդհանուր տնտեսական շահերից ելնելով համաձայնեցված գործելու հիմքով, հարկային մարմնի սահմանած կարգով, հարկային մարմնի ղեկավարի որոշմամբ ճանաչվում են որպես փոխկապակցված: Սույն մասի կիրառության իմաստով, հարկ վճարողներին որպես փոխկապակցված ճանաչելիս հաշվի են առնվում, մասնավորապես, հետևյալ հանգամանքները.

1) միմյանց միջև կատարվող գործարքների ծավալը, պարբերականությունը.

2) միմյանցից ձեռք բերվող ապրանքների հետագա վաճառքի գներն ու առևտրային վերադիրները.

3) որևէ ապրանքային շուկայում ունեցած մասնաբաժնի մեծությունը:

Վերոգրյալը հաշվի առնելով և ղեկավարվելով ՀՀ Հարկային օրենսգրքի 30-րդ հոդվածի 2-րդ մասով, ՀՀ կառավարությանն առընթեր պետական եկամուտների կոմիտեի նախագահի 2018թ. փետրվարի 15-ի թիվ 65-Ն հրամանի 2-րդ կետի 1-ին և 3-րդ ենթակետերով և 3-րդ կետով, Որոշմամբ «ԱՆԴԱԿՈ» ՍՊԸ-ն, անհատ ձեռնարկատերեր Կարեն Մուրադյանը, Հռիփսիմե Հովհաննիսյանը, Արշակ Մնացականյանը, Տաթևիկ Գրիգորյանը համարվել են փոխկապակցված և ընդհանուր տնտեսական շահերից ելնելով համաձայնեցված գործող:

3. Բողոքարկման առարկային վերաբերվող իրավական կարգավորումներ և եզրահանգումներ

ՀՀ հարկային օրենսգրքի 30-րդ հոդվածի 2-րդ մասի համաձայն՝ անկախ նույն հոդվածի 1-ին մասում նշված պայմանների առկայությունից՝ կազմակերպությունները և (կամ) ֆիզիկական

անծինք համարվում են փոխկապակցված, եթե Օրենսգրքի 70-րդ գլխով սահմանված երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա կազմակերպությունները և (կամ) ֆիզիկական անձինք, ընդհանուր տնտեսական շահերից ելնելով համաձայնեցված գործելու հիմքով, հարկային մարմնի սահմանած կարգով, հարկային մարմնի ղեկավարի որոշմամբ ճանաչվում են որպես փոխկապակցված: Նույն մասի կիրառության իմաստով՝ հարկ վճարողներին որպես փոխկապակցված ճանաչելիս հաշվի են առնվում, մասնավորապես, հետևյալ հանգամանքները.

1) միմյանց միջև կատարվող գործարքների ծավալը, պարբերականությունը.

2) միմյանցից ձեռք բերվող ապրանքների հետագա վաճառքի գներն ու առևտրային վերադիրները.

3) որևէ ապրանքային շուկայում ունեցած մասնաբաժնի մեծությունը:

ՀՀ ԿԱ ՊԵԿ նախագահի 15 փետրվարի 2018թ.-ի N 65-Ն «Երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա կազմակերպություններին և (կամ) ֆիզիկական անձանց ընդհանուր տնտեսական շահերից ելնելով համաձայնեցված գործելու հիմքով փոխկապակցված ճանաչելու կարգը սահմանելու մասին» հրամանով սահմանվում է երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա կազմակերպություններին և (կամ) ֆիզիկական անձանց ընդհանուր տնտեսական շահերից ելնելով համաձայնեցված գործելու հիմքով փոխկապակցված ճանաչելու կարգը՝ համաձայն նույն հրամանում պարունակվող հավելվածի:

Հետևաբար՝ ՀՀ հարկային օրենսգրքի 30-րդ հոդվածի 2-րդ մասի համաձայն՝ կազմակերպությունները և (կամ) ֆիզիկական անձինք կարող են համարվել փոխկապակցված, եթե օրենքով սահմանված կարգով ձեռքբերված տեղեկությունների հիման վրա կազմակերպությունները և (կամ) ֆիզիկական անձինք, ընդհանուր տնտեսական շահերից ելնելով համաձայնեցված գործելու հիմքով, հարկային մարմնի սահմանած կարգով, հարկային մարմնի ղեկավարի որոշմամբ ճանաչվում են որպես փոխկապակցված:

ՀՀ ԿԱ ՊԵԿ նախագահի 15.02.2018թ.-ի N 65-Ն հրամանի հավելվածի 2-րդ կետի համաձայն՝ Հայաստանի Հանրապետության հարկային օրենսգրքի դրույթների կիրառման առումով՝ ընդհանուր տնտեսական շահերից ելնելով համաձայնեցված գործող են համարվում՝

1) իրենցից, ըստ էության, անձանց խումբ ներկայացնող իրավաբանական անձինք և (կամ) անհատ ձեռնարկատերերը (այսուհետ՝ անձինք), եթե այդ խմբում ընդգրկվող՝

ա. անձանցից մեկը կամ մի քանիսը իրացրել են խմբի մեկ այլ անդամի կողմից նախորդող մեկ հարկային տարվա որևէ վեցամսյա ժամանակահատվածի ընթացքում արտադրած, ներմուծած կամ ձեռք բերած ապրանքների 60 և ավելի տոկոսը՝ արտահայտված քանակական կամ արժեքային մեծությամբ.

բ. անձինք նախորդող մեկ հարկային տարվա որևէ վեցամսյա ժամանակահատվածի ընթացքում միասին արտադրել են Հայաստանի Հանրապետությունում արտադրվող՝ արտաքին տնտեսական գործունեության ապրանքային անվանացանկ դասակարգչի նույն ծացկագրին դասվող ապրանքների 40 և ավելի տոկոսը՝ արտահայտված քանակական կամ արժեքային մեծությամբ.

գ. անձինք նախորդող մեկ հարկային տարվա որևէ վեցամսյա ժամանակահատվածի ընթացքում միասին ներմուծել են Հայաստանի Հանրապետություն ներմուծվող՝ Արտաքին

տնտեսական գործունեության ապրանքային անվանացանկ դասակարգչի նույն ծածկագրին դասվող ապրանքների 40 և ավելի տոկոսը՝ արտահայտված քանակական նամ արժեքային մեծությամբ.

դ. անձինք նախորդող մեկ հարկային տարվա որևէ վեցամսյա ժամանակահատվածի ընթացքում միասին մատուցել (կատարել) են Հայաստանի Հանրապետությունում մատուցվող (կատարվող)՝ նույն ոլորտին դասվող ծառայությունների (աշխատանքների) ընդհանուր արժեքային մեծության 40 և ավելի տոկոսը:

Սույն ենթակետում նշված արժեքային կամ քանակական ցուցանիշների որոշման հիմք կարող են հանդիսանալ հարկ վճարողների կողմից հարկային մարմին ներկայացված հարկային հաշվարկներում արտացոլված տեղեկությունները, հրապարակված վիճակագրական տվյալները, փորձագիտական գնահատականները:

Երկու և ավելի թվով անձինք, ըստ էության, անձանց խումբ են, եթե՝

այդ անձանց գործարար հարաբերությունները (ներառյալ՝ գործունեության ոլորտի, մատակարարների կամ գնորդների ընտրության, գործունեության իրականացման նպատակով կնքվող պայմանագրային հարաբերությունները (ներառյալ՝ պայմանագրերի պայմանները) փայամասնակցության կամ կառավարման կամ ղեկավար մարմնի անդամ հանդիսանալու կամ փայամասնակցի հետ ազգակցական կապ ունենալու հիմքերով ուղղակի կամ անուղղակի (միջնորդավորված) ձևով սահմանվում են շահառու հանդիսացող ֆիզիկական անձի որոշումներով,

այդ անձանցից մեկի կամ մի քանիսի գործունեության առանձնահատկությունները, փայամասնակցության կամ կառավարման կամ ղեկավարման մարմնի անդամ հանդիսանալու կամ փայամասնակցի հետ ազգակցական կապ ունենալու հիմքերով, ուղղակի կամ անուղղակի (միջնորդավորված) ձևով, սահմանվում են շահառու հանդիսացող ֆիզիկական անձի որոշումներով և, միաժամանակ, այդ անձը կամ անձանցից յուրաքանչյուրը խմբի մյուս անդամների առնվազն մեկի համար հանդիսանում է շահառու կամ այնպիսի անձի համար շահառու, որն իր հերթին շահառու է հանդիսանում խմբի այլ անդամի համար:

Շահառու է հանդիսանում այն ֆիզիկական կամ իրավաբանական անձը, որը այլ իրավաբանական անձի կամ անհատ ձեռնարկատիրոջ գործունեությունից ուղղակի կամ անուղղակի (միջնորդավորված) եղանակներով ստանում է եկամուտ,

2) այն անձինք, որոնք թեպետև իրենցից անձանց խումբ չեն ներկայացնում, սակայն այդ անձանցից մեկը կամ մի քանիսը իրացնում են մեկ այլ անձի կողմից նախորդող մեկ տարվա որևէ վեցամսյա ժամանակահատվածի ընթացքում արտադրած, ներմուծած կամ ձեռք բերած ապրանքների 60 և ավելի տոկոսը՝ կիրառելով գործարար շրջանակներում սովորաբար կիրառվող առևտրային վերադիրից 1.3 անգամ ավելի բարձր վերադիր: Այս դեպքում, ընդհանուր տնտեսական շահերից ելնելով համաձայնեցված գործող է համարվում նաև այն անձը, ում արտադրած, ներմուծած կամ ձեռք բերված ապրանքներն իրացնում են սույն ենթակետում նշված անձինք,

3) այն անձինք, որոնք թեպետև իրենցից անձանց խումբ չեն ներկայացնում, սակայն իրացվող ապրանքների կամ ծառայությունների (աշխատանքների) գները բարձր կամ ցածր պահելու, հարկվող շրջանառությունները ցածր ցույց տալու միջոցով բարձր եկամուտներ ստանալու, շուկա այլ անձանց մուտքը խոչընդոտելու կամ ծախսերը նվազեցնելու նպատակով գործում են համաձայնեցված,

4) այն անձինք, որոնց առևտրի, ծառայությունների կամ հանրային սննդի օբյեկտները հանդես են գալիս միևնույն անվանման կամ ապրանքային նշանի տակ:

Իր հերթին, «Վարչարարության հիմունքների և վարչական վարույթի մասին» ՀՀ օրենքի 43-րդ հոդվածի 1-ին մասի «բ» կետի համաձայն՝ անձի և վարչական մարմնի փոխհարաբերություններում ապացուցման պարտականությունը կրում է վարչական մարմինը՝ անձի համար ոչ բարենպաստ փաստական հանգամանքների առկայության դեպքում:

Նույն օրենքի 63-րդ հոդվածի 1-ին մասի «ա» կետի համաձայն՝ անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով:

Ելնելով վերը նշված իրավանորմերի դրույթներից և հիմք ընդունելով սույն որոշման 2-րդ կետում բերված փաստական տվյալները Հանձնաժողովը գտնում է, որ իրականացված օպերատիվ-հետախուզական գործողությունների արդյունքում ձեռք բերված ապացույցներով բավարար չափով հիմնավորվել է «ԱՆԴԱԿՈ» ՍՊԸ-ի, ինչպես նաև անհատ ձեռնարկատերեր Կարեն Մուրադյանի, Հռիփսիմե Հովհաննիսյանի, Արշակ Մնացականյանի, Տաթևիկ Գրիգորյանի փոխկապակցված և ընդհանուր տնտեսական շահերից ելնելով համաձայնեցված գործող հանդիսանալու հանգամանքը:

Այսինքն, Որոշումն ընդունվել է ՀՀ օրենսդրության պահանջներին համապատասխան, այն հիմնավոր է, հետևապես՝ դիմում-բողոքը ենթակա է մերժման:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

ՀՀ ՊԵԿ նախագահի երրորդ անձից (այդ թվում՝ պետական մարմնից) ստացված կամ օպերատիվ-հետախուզական գործողությունների արդյունքում ձեռք բերված տեղեկությունների հիման վրա անձանց ընդհանուր տնտեսական շահերից ելնելով համաձայնեցված գործելու հիմքով փոխկապակցված ճանաչելու մասին 22.07.2022թ.-ի N 504-3 որոշման դեմ Ա/Ձ Տաթևիկ Գրիգորյանի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

8/29/2022

X 

ԱՐՏՅՈՒ ՍՄԲԱՏՅԱՆ

ՀԱՆՁՆԱԺՈՂՈՎԻ ՆԱԽԱԳԱՀ՝

Signed by: SMBATYAN ARTYOM 3210860416

ԱՐՏՅՈՒ ՍՄԲԱՏՅԱՆ